

**EKSPERTI** Ibrahimagić i Sadiković, profesori ustavnog prava, za "Avaz"

# Državi BiH nedostaju elementi prisile!

Ako bismo htjeli promijeniti stanje, morali bismo osnažiti državu • Druga opcija su mehanizmi visokog predstavnika te mandat EUFOR-a

Omer Ibrahimagić i Čazim Sadiković, ugledni profesori ustavnog prava te političkih sistema, tvrde u izjavama za "Avaz" da našoj državi nedostaju elementi prisile da bi se nosila s opstrukcijama i antidržavnim ponašanjem iz RS, a u vezi s neprovođenjem konačnih i obavezujućih odluka Ustavnog suda BiH!

## Aneks 10

Sadiković, koji je i član Venecijanske komisije, ističe da svaka država po definiciji ima tri svoja konstitutivna elementa - teritorij, populaciju te monopol legitimne fizičke prisile. Ovo treće mi

nemamo! To govori o činjenici da se svih ovih godina jednostavno ne mogu implementirati tolike odluke Ustavnog suda BiH. Dakle, ako bismo htjeli promijeniti stanje, morali bismo osnažiti državu. Ova naša država, a što je u svojim aktima ustanovila i Venecijanska komisija, po svojoj konstituciji slaba je država - rekao je Sadiković.

S druge strane, navodi on, u Dejtonu je visoki predstavnik definiran kao konačni tumač Ustava u civilnoj sferi, dok je EUFOR jedan od njegovih instrumenata.

- U prvoj rečenici Aneksa 10 kaže se da visoki predstav-

nik ustanovljava političke i ustavne institucije. Moramo zaista zaključiti da je pitanje naše države krajnje neriješeno. Stoga treba iskoristiti vrijeme koje je ispred nas da se ponovo uspostave instrumenti države. Oni su postojali sve do Dejtona. Zašto ih danas nemamo, to je neko drugo pitanje - kazao je Sadiković.

Prof. Ibrahimagić ističe da BiH na papiru ima dva suverena organa. Prvi je državni, koji je skrojen po etničkom principu te koji, kao

takav, teško da može funkcionirati.

- Ja ne vidim tu sposobnost države zbog ovakve konstelacije da se postara da se provede ova odluka Ustavnog suda BiH. Jer vidjeli smo da i opozicija u RS podržava referendum. Dakle, imamo jedan kompletan entitet i trećinu državne vlasti, što u prijevodu znači cijelu jednu etničku grupu koja se suprotstavlja odlukama Ustavnog suda - istakao je Ibrahimagić.

Preostaje, kako navodi, drugi suvereni organ, a to je visoki predstavnik u BiH.

- Jedino on može upotrijebiti mehanizme koji su mu na raspolaganju, a to su, osim bonskih ovlasti, i EUFOR. Dakle, to su mehanizmi za provođenje Dejtonskog mirovnog sporazuma i očuvanje teritorijalnog integriteta države. Tako bi, teoretski, na dan referenduma i EUFOR mogao reagirati u skladu sa svojim mandatom - potcrtao je Ibrahimagić.

## Evropski put

Ibrahimagić je podsjetio na to da RS opstrukcije pravi još od početka primjene Dejtona.

- Treba imati na umu da to oni ne bi mogli raditi bez podrške, pa makar i prešutne, iz Beograda. Ne vidim da je Beograd prestao s poticajima Miloradu Dodiku. Čak tvrdim da je dolaskom Dodika na vlast u BiH napravljen aranžman za opstrukcije tako da Srbija na evropskom putu pretekne BiH! A to se i desilo - zaključio je Ibrahimagić.

A. DUČIĆ



Ibrahimagić: Poticaji iz Beograda

Sadiković: Osnajiti državu

## Milutinović u Dejtonu napisao da će RS postupati po svim aneksima

Govoreći o ulogama Srbije i Hrvatske, Ibrahimagić podsjeća na važnu činjenicu sročenu u Dejtonskom sporazumu.

- U tim materijalima ima izjava tadašnjeg ministra vanjskih poslova Savezne

Republike Jugoslavije Milutina Milutinovića da ta država priznaje teritorijalni integritet i suverenitet BiH i da se obavezuje da će RS u BiH postupati prema svim aneksima Dejtonskog sporazuma. Takvu istu izjavu u

ime Hrvatske dao je tadašnji ministar vanjskih poslova te zemlje Mate Granić. Srbija i Hrvatska su obveznice Dejtonskog sporazuma, a nikako garanti, kako se to pogrešno tumači - rekao je on.

## Američki analitičar Kurt Basiner za "Avaz" Brisel neće raspravljati o referendumu, već o bh. aplikaciji

Opovrgnuo medijske špekulacije da bi u utorak BiH mogla biti kažnjena nedobivanjem zelenog svjetla za nastavak EU integracija

Američki analitičar i jedan od osnivača Političkog vijeća za demokratizaciju (DPC) Kurt Basiner (Bassauner) izjavio je jučer za "Avaz" da, prema njegovim informacijama, Vijeće za opće poslove EU sutra uopće neće raspravljati o referendumu u RS, već isključivo o bh. aplikaciji za članstvo u Uniji!

Time je Basiner opovrgnuo određene medijske špekulacije da bi u utorak država nedobivanjem zelenog svjetla za nastavak EU integracija na sjednici evropskih ministara mogla biti kažnjena zbog opstrukcija RS u vezi s odlukama Ustavnog suda BiH.

Govoreći o daljnjem razvoju situacije kada je riječ o

čvrstim namjerama rukovodstva da nastave održavanjem referenduma, Basiner je istakao da bi visoki predstavnik u BiH Valentin Incko (Inzko) mogao koristiti bonške ovlasti da bi se osiguralo provođenje odluka Ustavnog suda BiH, "iako su neki u međunarodnoj zajednici željeli sačekati da ovaj sud revidira svoju odluku".



Basiner: Šta će Incko uraditi

- Glavna pitanja za Incka su hoće li djelovati bez potpune zapadne podrške, dati ostavku zbog nedostatka te podrške ili će prihvatiti još jedno poniženje od onih koje zapravo ovdje predstavlja - istakao je Basiner. A. Du.



Mehić: Postiže uspjehe

**Ličnost dana** Mustafa Mehić

## Veliki sportista

Postao prva slijepa osoba u regionu koja je istrčala Sarajevski polumaraton

Za sve je pohvale jučerašnji rezultat koji je postigao 20-godišnji Mustafa Mehić. Iako je ovaj mladić od prije četiri godine slijep, to ga nije spriječilo da postigne uspjehe u životu.

Tako je jučer istrčao Sarajevski polumaraton dug 21 kilometar. Postao je prva slijepa osoba u regionu kojoj je to pošlo za rukom!

Uzred, netom nakon ovog ogromnog uspjeha, do-

bio je jednog velikog fana, a to je državni ministar saobraćaja i komunikacija BiH Ismir Jusko, koji je predložio da Mustafa i njegov trener Tomislav Cvitanušić dobiju nagrade za trenera i sportistu godine.

Mustafa je odličan student druge godine Pravnog fakulteta Univerziteta u Sarajevu. A jučer je u Sarajevu ostvario jedan od svojih životnih ciljeva. A. Du.

## Dokument objavljen prije 30 godina Referendum zakazan na dan objave Memoranduma SANU



Memorandum SANU objavljen u "Večernjim novostima"

Referendum o danu RS zakazan je na 30. godišnjicu objave zloglasnog Memoranduma Srpske akademije nauka i umjetnosti (SANU), za koji se smatra da je prije tri decenije bio temelj ideje o „velikoj Srbiji“. Naime, 24. i 25. septembra 1986. godine u "Večernjim novostima", u dva nastavka, prvi put je objavljen Memorandum SANU. U dokumentu se tvrdilo, između ostalog, kako su Srbi diskriminirani tadašnjim jugoslavenskim ustavom te da je srpski narod u Jugoslaviji neka vrsta primarnog entiteta s pravima koja nadilaze sve političke i geografske podjele.

U ovom dokumentu, koji mnogi smatraju ključnim za raspad bivše države, istaknuto je da se „pitanje cjelovitosti srpskog naroda i

njegove kulture u čitavoj Jugoslaviji postavlja kao suštinsko pitanje za opstanak i razvoj tog naroda“.

I dok su danas, 30 godina poslije donošenja ovog dokumenta, o njemu u Srbiji otvorene rasprave o njegovoj štetnosti i sve se više ističe kako je 18 akademika tadašnje SANU koji su bili protiv njegovog donošenja preglasano, u manjem bh. entitetu referendum zakazuju baš na godišnjicu njegove objave.

Na ovaj način, dok srbijska intelektualna elita daje naznake da je spremna kritički preispitati ovaj dokument, u RS očigledno i ovom simbolikom žele se vratiti u mračnu prošlost, umjesto da građane i narod povedu u svjetliju budućnost. S. D.